


O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

NOVEMA 2017

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

'A 'O Ai 'Ea A'u Nei! O Ai Fo'i Lo'u Nu'u?



LE FALE IUPELI

**A o ai 'ea a'u nei!
O ai fo'i lo'u nuu?**

1 Nofoaiga Tupu 29: 1-19
loane 3: 16-21

Fuaiupu filifilia: 'A o ai ea a'u nei!

O ai ea foi lo'u nuu, ina ua matou mafaia ona fai taulaga ma le loto faapenei? Aua mai ia te oe mea uma lava, o au mea foi ua matou foaiina atu ai ia te oe."

faaauau itulau e 2

Li Van Vu

**O le tala i le ulugalii mai
Vietiname**

Tusa o le 13 tausaga talu ai a o tau amata le ma fale'oti ulu ma lo'u to'alua o Mariane, e

silasila itulau e 11

'A 'O Ai 'Ea A'u Nei! O Ai Fo'i Lo'u Nuu?

mai le itulau muamua

A tatou faitau i le mataupu leni, tatou te maofa i le faatuatua o le tupu o Tavita, ma le faatuatua o lona nuu. Ma le fai mea mitamita i lo latou Atua. Ma le anoano o mea taua na latou foa'i mo le fausia o le malumalu i lo latou Atua. O auro, o ario, o apa memea, o u'amea, o maataua, o laau, o maa soama, o maa e faavaa ai, o maa fepulafi ma lanu eseese, atoa ma maa sesa.

Ae le gata i lea, ua avatu foi e Tavita lava ia, o ana oloa taua o auro ma ario e faaopopo i mea ua sao e ia ma lona nuu mo le malumalu, e sili atu i mea na lautogia. Ona o lona talitonuga, e le se maota mo ia, poo se tagata o lona nuu, a o le maota mo le Atua.

O le isi mea e tatau ona tatou matauina, o le foa'i ma le loto malie. Loto malie matai sili, loto malie alii o ituaiga o Isaraelu, ma alii o ta'ito'aafe ma ta'ito'aselau, ma e pule i le galuega a le tupu. Fai mai na fiafia le nuu, aua na foa'i ma le loto malie. Foa'i ma le fiafia ma le loto ato'atoa i le Alii, e pei ona tatou faitauina i le tusi o Nofoa'iga Tupu.

Peitai, ana le talitonu Tavita i le mea e mafua ai lo latou mau mea, lo latou tamaoaiga, lo latou lima malosi, lo latou mafai ona fai o se mea, a na le talitonu Tavita i le mea e mafua ai lo latou tamaoaiga lea, e le faigofie ona mamulu se auro, se ario, se apamemea, se laau poo se maa soama poo se maa sesa. Fanu e lima mau ma le loto foa'i le nuu.

Aisea ua sasaa ai le oloa o le nuu

i le Atua? Aisea ua sao ai le nuu ma le loto fiafia? Aisea ua tatala ai 'au'afa o oloa a 'aiga ma latou tuuina atu mea silisili i le Alii?

Fai mai Tavita i le fuaiupu e 12 o le 1 Nofoa'iga Tupu 29: "*Mai ia te oe le oloa ma le mamalu, o oe e te pule i mea uma lava; o ia te oe foi e faateleina ma faamalosi tagata uma lava.*"

Ma le fuaiupu e 16 fai mai: "Le Alii e, lo matou Atua, o le oloa uma nei ua saunia e i matou e fai ai se fale mo oe, mo lou suafa paia, e mai ia te oe ia, o au mea uma foi ia."

E le taumate le toe tepa i tua o le tupu o Tavita i tausaga ua mavae, mai lona taule'ale'a; ma lona fasiotia o Koliata i lana maata; ma lona faasaoina o le tupu o Saulo; le filifilia o ia e fai ma tupu o Isaraelu a o lea e soifua Saulo; o lona mulilua ia Patisepa ma lana tatalo ina ia faamagaloina o ia; ma le tele o mea na fesoasoani mai ai le Atua ia te ia; e oo lava fo'i i lona lava atalii o Apisaloma na fouvale ma sii le taua ia te ia. Ae sa fesoasoani mai lava le Atua ia te ia, ma faasaoina o ia.

O le a goto le la o lona soifua, ona toe tepa ai lea i tua, ma toe manatua le alofa ma le agalelei o lona Atua ia te ia. Se alofa ina a tele! Se mamalu na faapaleina ai o ia ina a tele! Se tamao'aiga na ia maua ina a tele! Le tamao'aiga ma le mamalu lea na vaavaai iai le teine Seepa, le tupu tama'ita'i o lea malo, ma faapea ane, ua matua tele mea ua ou vaavaai atu iai, i lo

mea na ou faalogo iai. Ona alaga ai lea o Tavita ma faapea ane: 'A 'o ai ea au nei? O ai ea fo'i lo'u nuu ina ua matou mafaia ona fai taulaga ma le loto faapenei? Fai taulaga ma le loto fiafia!

Ua manatu Tavita i ona sese e tele. Ua manatu o ia ua ia le faia le malumalu ona ua toto ona lima. Ua masaa le toto o tagata i ona lima. Aemaise le toto o Uria le tane a Patisepa. Na mafua ai ona tatou maua, se tasi o tatalo e aupito sili ona logo lelei i le Tusi Paia, ma ta'ita'iina ai foi tatou, lea na tatalo ai Tavita ma faapea ane: "Le Atua e, ia e faia se loto mama mo a'u; ma ia e faafouina se loto mau i totonu ia te au. 'Aua e te lafoaiina au i ou luma; aua foi e te aveeseina lou Agaga Paia ia te au. Ia faafoisia mai ia te au le olioli o le olataga mai ia te oe; ia e taofimauiina foi o a'u ma le loto fiafia.....O taulaga i le Atua, o le loto momomo lea; le Atua e, e te le inosia le loto momomo ma le nutimomomoia!"

Na ofo tagata o se nuu i le faatuputeleina pea o le tamaoaiga o se fama, tiga lava ona tele o ana mea e foaiina mo isi tagata ae mauoloa lava.

Fai mai le tali a le fama: 'Oi, o le mafuaaga, ou te fiu lava e suo atu mo le Atua nisi o mea na ia foai mai mo a'u, ae toe suoina mai foi e le Atua i la'u itu, i lana suo e tele mamao atu i la'u suo.'

Ia ua mae'a lo tatou malumalu! Le Fale lupeli fou i Malua. O le fale na tatou fausia ma le mitamita mo lo tatou Atua. E taugata, ae tatou te le'i solomuli ai. Tatou fai taulaga e pei lava e leai se mea o tupu, ona o lo tatou fai mea ma le loto malie. O le fale mo lo tatou Atua. E iai faafitauli e tofotofoina ai tatou, ma faavaivaia ai tatou, ma lo tatou

faaauau itulau e 3

O LE LAUGA

Isaia 53:1-5

Mataio 9:10-13

Matua: Isaia 53: 2

“e lē aulelei pe lalelei o ia; a tatou vaavaai ia te ia e leai sona matagofie, ina ia tatou manana’o ai ia te ia.”

Manatu Autu:

“MATIVA I FOLIGA, AE MAU’OAI LE ALOFA”

Faatomuaga:

Saafiafiga o le fatupese ina ua lē taulau le faamoemoe, o le miti ua leva ona momo’o iai a’o lea ua lē tau lau o le faamoemoe. Fai mai le fatu pese, e mativa, e lē tagolima e vaivai le tamaoiga e tua iai, ae na pau a lea o le mea e lē mativa ai, o le alofa.

E ese foi le malie o lenei fatupese, ua faaali lagona e auala

i le pese ma ta’utino ai le solo a le tamaloa, e uiga i le ta’u faatauvaaina ona e vaivai le tamao’iga ma le lē aulelei e tosina iai le vaai a le tama’ita’i. O mafutaga ia o lo’o ta’atele i lenei vaitau, a lē tele lava ni tupe a le tama ma auleaga, e fiu e su’e se ama o lona sa.

Isaia 53:1-5

O le mataupu e 53, e fitoitonu i le vaega lona lua o le tusi a Isaia, lea e manatu le ‘ausu’esu’e o le Tusi Paia, o le vaitau o le tafeaga. E lē tau faamatalaina le tulaga ua iai Iuta i le vaitau, ua ifo ma tapuai i atua ese, matuā galo nimo lava lo latou Atua, ae fai lava le mea ua manatu iai le tagata ia.

O le feau taologologo lea o lo’o pesepese ai pea Isaia, **“O ai ua talitonu i la matou upu e taologologo atu; ua faaalua ia te**

ai le ‘a’ao o le Alii?” O le fesili lea o lo’o tulituliloa ai e le perofeta po’o fea tonu o taoto ai le faatuatua o le nuu, ae po’o ai foi ua ia lagona le salamo,

Naunautaiga o Isaia ina ia lagona uma e le nu’u le salamo e foi ai ma le lotomaulalo i le Atua, foi ma le faatuatua faamaoni e toe faamautu lelei le feagaiga ua mae’a ona fai, ma toe faatino le tautua ma le auaunaga na amata ai la latou mafutaga ma le Alii. Le nu’u faigata ma le faalogogata, a’o uiga lava ia o le Atua e lē ona tuuna ona tagata e o ese atu ma ia, ina ne’i ma’umau le mafutaga, aemaise le feagaiga ua uma ona osi.

E lua ni vaega e mafai ona vaevae iai le lauga ma le vaega filifilia o le tusi a Isaia.

(1) **MATIVA I FOLIGA** fuaiupu 2&3

O le ituaiga Mesia lea o le a afio mai e faaola i le nuu o le Atua. E mativa i foliga, mativa i le *faaauau itulau e 4*

‘A ‘O Ai ‘Ea A’u Nei! O Ai Fo’i Lo’u Nuū?

mai le itulau e 2

vaavaai atu ua fultua mai nisi.

A o le sagisagi ma lē onosa’i e fau le fale mo lo tatou Atua tusa lava poo le a faitioga ma uiga e aliali mai o tagata, e suamalie mulimuli ane pe a mae’a ma le manuia le galuega. Ona oo foi lea ia i tatou le mea na oo ia Tavita ma le nuu o Isaraelu e pei ona tusia i le 1 Nofoaiga Tupu 29:9-14: “Ona fiafia lava lea o le nuu, aua na foa’i ma le loto, aua na latou foa’i ma le fiafia ma le loto atoatoa i le Alii. Ua fiafia foi Tavita le tupu ma le fiafia tele lava. Ona faamanu atu ai lea o Tavita i le Alii i luma o le

faapotopotoga uma, ma ua faapea atu Tavita, ia faamanuina oe, le Alii e, le Atua o Isaraelu, lo matou tama, mai le vavau e oo i le faavavau. Le Alii e, e ou le silisili ese, ma le malosi, ma le matagofie, ma le mamalu, ma le malualii; aua o ia te oe mea uma o i le lagi ma le lalolagi; le Alii e, e ou le malo, o faasilisili oe e silisili i mea uma lava. Mai ia te oe le oloa ma le mamalu, o oe e te pule i mea uma lava; o iai foi i lou aao le mamana ma le malosi, o ia te oe foi e faateleina ma faamalosia tagata uma lava. O lenei, lo matou Atua e, ua matou faafetai atu ia te oe, ma vivii atu i

lou suafa mamalu. A o ai ea a’u nei? O ai ea fo’i lo’u nuu, ina ua matou mafaia ona fai taulaga ma le loto faapenei? Aua e mai ia te oe mea uma lava; o au mea foi ua matou foaiina atu ai ia te oe’.....”

O le masina lenei o a tatou faiga taulaga i le Alii. A o le manatu, e le taitai ona tutusa mea tatou te suoina atu i le pito a le Atua, ma mea na te suoina mai i o tatou luma. Aemaise lo tatou ola maua pea. O ia lava e ona, o ia foi e ona mea e tele o ia toe suoina mai.

Tatou loto maua ma tatou tatalo, le Alii e, ia e alofa ma talia mai o matou ola ofoina atu i lau Afio, matou te faitaulaga ai ia te oe. I le Suafa mamalu o Iesu Keriso lo matou Alii Faaola, Amene.

tuufaatasia e

Afemata T. Apelu Aiavao

Faatonu “O le Sulu Samoa”

O LE LAUGA

mai le itulau e 3

tamaoiga o le tino e mativa foi i le malosi. A'o le Mesia o lo'o mananao iai Iuta, e sau ma le pelu ma le pule e lavea'i i latou peitai, ua le'o lea le faaola o lo'o moemiti iai le nuu. O le Mesia e leai se matagofie, lē aulelei foi, a'o lona alofa e tutusa uma ai tagata.

A fua i lona tupu'aga, ua iloa manino ai lava e mativa. O le upu moni, e seāseā se laau poo se tagata e nofo i se eleele naumati ola lelei, aua e faalēlava mea e tua iai. A'o lea ua fai mai le tusitala, o le tupu'aga lea o le Faaola. O le faailoga o le mativa ma le lē taualoa.

O le mafuaaga foi lea o le faapea o upu a Isaia: **“e lē aulelei pe lalelei o ia; a tatou vaavai ia te ia e leai sona matagofie”** Vaivaiga lea o le tagata, e fua le faaiuga i le aulelei ma le matagofie o le mea ua tosina iai le vaai. Mafuaaga foi lea o le faailoa manino mai e le perofeta, e leai se matagofie ina ia mananao iai. A'o le tofotofoga lea mo Iuta, po'o le a sa latou tali, a'o le ā foi sa latou faatatau i le mataupu ua aumai e Isaia e uiga i le Faaola mo i latou. O le isi foi lea mafuaaga o le ta'u manino mai lava e le tusitala, o le Mesia o le'a afio mai, e inosia ma tuulafoaina, ma ua lē manatua lava. E lē mate gatā le tulaga e iai le Faaola o lo'o pese ai le perofeta, e atagia lava i faaupuga, le matuā leai lava o se avanoa e mafai ai ona manatua le Mesia ma lona afio mai aemaise ai o ona puapuaga.

(2) MAUOA I LE ALOFA fuaiupu 4&5

Ae ui i le leai o se matagofie ma se aulelei e mafai ai ona talia i loto le afio mai o le Faaola, peitai, o lea e manino le feau momoli a le perofeta, o le alofa e la'ei ai mea uma.

Le alofa lē faatua'oia o le Atua e ala mai i lona Alo, le Mesia valo'ia. Le alofa lea e ta'ua e le perofeta, ua ia tau'ave o tatou tiga ma o tatou faanoanoa. Le alofa ua ia lavātia ai ona ta'ali o puapuaga, ua manu'a ai o ia i a tatou agasala, ua momomo ona o a tatou solitulafono ma ona faalavalava ua malolo ai i tatou.

O le atoaga lea o le galuega a le Alii o le'a afio mai e pei onā valo'ia e Isaia. O le alofa e na te tauave ai faigata uma ina ia ola le tagata agasala. O le feau foi lea o lo'o laualuga i le taulogologo a le perofeta i lona nu'u, a'o iai i le tafeaga. Manatu maualuga o Isaia, ia toe foi le nuu i ona laufanua ma ona eleele, a ua iloa ma malamalama le nu'u i le alafua e savavali ai, e manuia ai.

Mataio 9:10-13

Aoaga tupito a Iesu o lo'o ia faamamafa i ona so'o ma lona nuu, alofa. Silafia e Iesu siosiomaga o lo'o ola ai le au-faresaio ma le autusiupu, e a'oa'o atu le tulafono ae leiloa ona ola ai, leiloa foi ona alofa. Faamalolo le supa, ae fai mai ua faifai i le Atua. E oo lava foi i le aai faatasi o Iesu ma ao lafoga ma tagata agasala, o tuufesili pea “Aisea e aai faatasi ai la outou a'oa'o ma tagata agasala?”

Uiga lē lelei ia o le au faresaio ua lauiloa ai i totonu o Iutaia, ola faafoliga ma le faafiaamionu; ae aliali manino ai le lē alolofa. Ae manino lelei le fetalaiga a Iesu **ou te loto i le alofa ae lē o le taulaga**. O le upu alofa ua faaliliuina mai i le upu Eleni o le foai ua faia ma le loto atoa, o le alofa e leai se tuaoi, e lē faailogalanu, e tutusa tagata uma.

O le alofa lea ma le finagalo moni lea o le Alii e tatau ona ola ma savavali ai, ona maua lea o

manuia o le Atua e faavavau. O le alofa moni lea e faatino ai le amiotonu e amanaia ai le tagata lē taualoa, le tagata mativa ma le tagata agasala. O le uiga lea o lana fetalaiga na sau e valaau le tagata agasala ae le o le amiotonu.

Faatatau:

O le feau taua foi lea mo i tatou uma le au-kerisiano, alofa i soo se tasi, alofa i lou tuaoi. Ua aoao mai foi Iesu ia tutusa lava lou alofa i le tagata ma'i ma le tagata malosi, o le alofa foi mo le mauoa ia tutusa lava ma le alofa i le mativa.

faacauu itulau e 5

Fai mai le tasi fatupese: ‘E mativa i foliga, ae mauoa i le alofa, e ui ina vaivai le tamaoiga...’ E malie foi lea ituaiga fatuga e peisea'i o lo'o pese le fatupese i le lē amana'iaina ona o ona foliga vaaia, a'o lona alofa e tumau tusa pe lē lava mea e faatino ai.

A'o le faafitauli lea o lo'o tupu i le soifuaga nei. E fua le alofa i le tulaga e iai le tagata, a aulelei ua tele iai, a auleaga e faapena foi ona faa-lē-ano iai. A le'o lona, ua fua le alofa i le mea e maua mai, poo le tele foi i le uso tu'ofe ae itiiti i le uso taufeagai.

Peitai, e le'o lea le finagalo o le Alii, e tutusa tagata uma i lona alofa. O le feau tupito lea a le perofeta o Isaia, o le Mesia valoia e mativa i foliga, e leai sona matagofie e tosina gofie ai loto ina talia ai lona afio mai. E mauoa i le alofa e ala i lana galuega faaola, e na te tauave o tatou tiga o ona faalavalava ua malolo ai tatou.

Kerygma

O lona maliu ma lona toetu manumalo i le oti ma le tuugamau, ua tatou manumalo faatasi ai ma ia i lona malo e faavavau, pe a salamo moni i tatou ma faatuatua ia te ia e faavavau. Amene.

Saunia: Ulale Sakaio (AM)

Ofisa Tutotonu EFKS

Tamaligi

John Knox - 1514-1572

IOANE NOKISE

“O Le na Ta’ita’i ma le Pelu”

Le Atua e, aumai mo a’u Sikotilani,
a leai e sili ona ou oti!

O le ‘Au Kasitili Totoa

O tagata pulupulu ia na latou faaoo le sala oti ia Katinale Pitone, latou te le’i tuua le maota o Sagato Anitele’a, (St. Andrew’s Castle), a ua nonofo ai ma latou pulea i lea vai taimi. O le faasalaga na latou faaoo i le katinale, e faavae i luga o mea tau le lotu, atoa ma mea tau polokiki. I le manatu o ia tagata, o Katinale Pitone, o se sui lava lea o le malo o Falani lea na latou aia fua i mataupu tau le atunuu o Sikotilani. E le gata i lea, o ia foi o le sui o le lotu Katoliko. O lo latou faatautauina ifo o Katinale Pitone mai le Maota o Sagato Anitele’a, o se faaaliga lava lea o lo latou tete’e i le Ekalesia Katoliko ma le malo o Falani. Na oo ina latou ta’ua i latou o le ‘Au Kasitili, (o se igoa e faavae mai luga o le upu Castle, o se maota sa fai ma ‘olo e malu puipuia i au’upega ma pa e si’o ai, lea na latou faaaogaina.

Na vave ona salalau i Europa tala i le fasiotiga o Katinale Pitone, ma e na matua fiafia ai le toatele o tagata ona, o le toatele o tagata e tete’e i le malo o Farani. O le lagolago a tagata lautele i le mea na faia e le ‘Au Kasitili, na avea ma mea e faaauau ai pea ona pulea e le ‘Au Kasitili le Maota o Sagato Anitele’a.

E le’i iai Ioane Nokise i le taimi na faasalaina ai Katinale Pitone i le oti, ae na ia lagolagoina le faasalaga ona o lona talitonuga, o tagata amio pi’opi’o e oo lava ina

taunuu mai iai le faamasinoga a le Atua. O le vai taimi foi lea e le’i oo ina lauiloa ai Ioane Nokise, e le’i oo foi ina avea o ia ma ta’ita’i iloga o le lotu.

O le tete’e a le ‘Au Kasitili na fai ma mea e le tuufauina ai le ‘Au Porotesano e le malo o Sikotilani. O le vai taimi foi lea na amata popole ai Ioane Nokise i lona ola, ma solasola ai mai lea fale i lea fale e lafi ai ne’i maua o ia. Na mafaufau foi e sola i Siamani, peitai na manatu matua o ana tamaiti a’oga, e saogalemu o ia pe a nofo pea i le Maota o Sagato Anitele’a, lea o loo nonofo ai le ‘Au Kasitili, o tagata Porotesano. O le a maua mai ai foi e tamaiti a’oga se fesoasoani tele mai ia Siaoisi Nokise.

Ua amata foi ona auina atu e nisi o tamalii iloga o le atunuu (lords) ni uta meaa’i i le Maota. Na taunuu atu foi se isi vaa mai Egelani ma lana foi uta o mea’ai mo i latou o nonofo i le Maota. Tusa e tasi le tausaga talu ona iai le ‘Au Kasitili i le Maota, ae alu atu foi ma Siaoisi Nokise ma nofo ai, i le masina o Aperila i le tausaga e 1547, ma ‘au’au faatasi ma le ‘Au Kasitili.

Na amata siisii ai i luga le tulaga o Siaoisi Nokise i le taupulega i totonu o le Maota.

Sa faalogologo Ioane Rou ia Nokise a o ia a’oa’oina tamaiti a’oga i mataupu tau talitonuga faa-Porotesano, ma ia ofo ai i le manino o le faamalamalamaga e Nokise o ia mataupu ma talitonuga.

Na oo ina fesiligia e tagata Katoliko ia Ioane Rou e tuuina atu ni manatu e tete’e ai i talitonuga faavae faa-Katoliko, ona fai ane lea o Rou ia Nokise na te tusi i lalo ia o latou talitonuga tete’e. Ona alu ai lea o Rou ma ave le lisi lea o talitonuga tete’e i le fonu a patele. Na fo’i mai, ona ia faatonuina lea o Nokise ina ia avea o ia ma faifeau o le Maota o Sagato Anitele’a. Ae tete’e e Nokise, ona fai mai a ia na te le’i maua mai se valaau faale-tulafono mo lea tofiga.

Na vave lava ona fai e Rou le togafiti e fo’ia ai lea mea. O le Aso Sa na sosoo ai, na lauga ai Rou i le tofia o faifeau, ma tusi atu ia Nokise i luma o le faapotopotoga, ma na lu’iina Nokise ina ia na talia le tofiga e fai ma faifeau. Na vaai atu o ia i le faapotopotoga, ma talosagaina le latou faaleoina o lo latou lagolago i le tofiga ua fai. Na matua lagolagoina ma le fiafia e le toatele o le faapotopotoga.

Na ofo ai Nokise, ma matua tagi ai i luma o le faapotopotoga. Ma tu atu i luga, ma savali i fafo mai le malumalu, ma tagi ai lava.

E matauina i ia uiga o Nokise ona lagona e uiga i le Atua, lona faaaloalo, ona talitonuga. E moni lava o ana upu e fai si ma’ama’ai ma malolosi, ae o ni upu lava e fetauilelei ma ituaiga o tagata o ia vai taimi. E le fia faalogo tagata i ni tala e le siisii ai lagona ma faate’i tagata. E mana’omia upu e faamalepeina fatu ma lagona o tagata ae latou te maua ai le mea moni.

Sa faitioina tele e tagata le malolosi o lauga a Nokise, ae le’i vaavaai i latou i le mafuaaga o le malolosi o ana upu, ma lona tulituli’au puina o le mea moni.

I nei aso, o lo tatou avea ma Kerisiano, e pei e tulaga lua i mea tatou te manatu iai. Na o se mea e tatou te lolotu ai i le Aso Sa. E pei ua ta’ita’iina mea tatou te fai, ma a tatou aga ma tu, e o tatou lanu ma pe o fea le atunuu tatou te o

faaauau itulau e 6

John Knox - 1514-1572

IOANE NOKISE

“O Le na Ta’ita’i ma le Pelu”

Le Atua e, aumai mo a’u Sikotilani,
a leai e sili ona ou oti!

mai le itulau e 5

mai ai.

E lei faapea i taimi o le ‘au toe fuata’i (reformers). O le ta’u o oe o le Porotesano i taimi o Nokise, o lona uiga, e tasi le aga, poo le aganuu. Pe faapefea ona latou mafaufau iai, ma faatino, ma faataunuu mea uma latou te fai, pe Porotesano pe leai. O le avea ma Porotesano na matua ‘apoina o latou lagona ma latou faatino ma le atoatoa. O le tagata ‘a le Porotesano, o lona uiga e Katoliko. E leai se faavaelutai. O ia mea e lua e tofua ma le ituaiga ola e iloa ai. I ia auga tupulaga i taimi o Nokise, sa feoti tagata ona o lo latou lagolagoina o o latou talitonuga.

O se mea matua tele, tele lava, le ta’ua o le tagata o le faifeau Porotesano. Na iloa lelei e Nokise lea mea, ma ia talia ma le loto atoatoa. Ma e to ai lo’u pulou ia Nokise. E iai ni sese o Nokise. Peitai e le matauina e le Atua ni ou faaletonu. E matauina e le Atua le malosi o lou taupati e faavae i luga o lou faatuatua.

Sa lauiloa Nokise o se tagata sa malosi lona faatuatua i le Atua. O ia o se perofeta. Ma e leai se faa’afa’afa, pe faaleagalua ia te ia. O ona lava talitonuga ‘a ‘e vevela, matua vevela; ‘a ‘e maalili foi, matua maalili. ‘Aua e te faa’afa’afa. E le’i mana’o o ia e avea o ia ma tagata taulagalaga i manatu o tagata. Ae sa talitonu o ia o ia lava o le ‘au’aina a le Atua, e tau mo le sailiga o le mea moni se’ia oo i lona oti.

E ui lava e le’i atoatoa ona lelei o lana auunaga i le Atua, (ia tatou manatua na o Iesu na atoatoa lana auunaga i le Atua), ae na matua malosi lona loto mo le galuega sa ia faia. Ma o le mea lea e tatau ona tatou manatua i le soifua o Nokise. E tele ina tatou fua le lelei o a tatou galuega i viiga tatou te maua mai tagata. A o le Atua, o lana fua, pe o le a le malosi o lou naunauta’i e fai le galuega a le Atua, ma pe o a ni fua o maua mai ai mo le malo o le Atua.

O Lana Lauga Muamua: O le Aano o le I’a Katoliko

E tele ni aso o mafaufau Nokise i lona valaauina mo le galuega a le Atua. Ua tele ina nofonofo na o ia ma ua le toe talanoa i se isi. Peitai ane, e le’i umi ae alia’e se suiga.

A o faatalitali pea ma mafaufau pe moni lona valaauina, ae ia faalogo o le a lauga i se falesā lata ane se faifeau e matua le fiafia iai. Ua ia filifili nei o le a alu e faalogologo i le faifeau lea pe o le a lana lauga o le a fai i tagata. Ma e na faamaonia lava le ita o Nokise i le lauga na fai e le patele. Fai mai le patele i lana lauga e na o le lotu Katoliko e iai le pule aoao e talia ai ni manatu o laugaina e soo se tagata, pe leai foi. E le’i toe faatali Nokise a ua tu atu i luga ma alaga atu ma le leo tele a o fai le lauga, ma na faaali e faapea e na te mafai ona faamaonia ua alu ese le lotu Katoliko mai talitonuga o le uluai Ekalesia, e sili atu i lo tagata Iutaia ma lo latou o ese ma le tulafono i le taimi na latou

tuu’ia ai Iesu. Peitai e le’i fia finauina e le patele le mataupu ua laga e Nokise. A o le motu o tagata, ua alalaga atu ia Nokise ina ia ia faamaonia ana faamatalaga. Na talia ma le fiafia e Nokise.

O tala fou na maua ai e tagata lautele le faaaliga, o le a lauga Nokise i le Aso Sa e sosoo ai ma na faamalamalamaina le mataupu ua ia laga. E le’i taitai ona amata le lotu a ua matua tumu le falesa i tagata: toatele tagata iloga ma le taua o le aai na auai, o faiaoga iloga o le Iunivesite, na matua toatele foi faifeau, patele, monike, felela, mai itu, uma o le atunuu o Sikotilani. Na auai ma lo latou manatu o le a faaeteete ai Nokise i ana tala e fai i lana lauga. Ma le tagata iloga i mataupu silisili, o John Major, na auai foi ona o lona faaaloalo ia Nokise.

Na savali atu ma le loto tele ma le toto’a Nokise, ma laa atu i luga i le pulelaa, ma amata lana uluai lauga, ma ia matua auau’eseina ivi o le i’a o mataupu tau talitonuga faa-Katoliko. Na faavae lana lauga i luga o le Tanielu 7: 24-25. Na ia faamatala le vaai ma le loto mama, faamatala auiliili uiga faa-Papelonia, faa-Peresia, faa-Eleni, faa-Roma. O le vaega mulimuli, o le faa-Roma, na ia faaalia, o le Ekalesia Katoliko lava lea ma le pope. Na ia faaigoa foi le Ekalesia o le sunako a Satani, ma ia fai mai, o e o pulea le Ekalesia e tetee i mea moni faa-Kerisiano. Na ia teena foi nisi o talitonuga i le pule a le pope ma ia faamatala ni talaaga o amio a nisi o pope o loo lipotia mai e isi tusitusiga. Na ia faaogaina le Feagaiga Tuai e na te faaleaogaina ai talitonuga i tagata oti e o ma nofonofo i nisi nofoaga e toe faalelei ai. Na ia faaalia foi o le Misasa e le tusa ma le feau na afio mai ma Iesu. Ona ia oo atu ai lea i le pogai o le pulega faa-Katoliko, na ia tuu’ia ai le pope o se tagata e tetee i mataupu tau Keriso. (anti-christ). Pope uma.

faaauau itulau e 7

IOANE NOKISE

“O Le na Ta'ita'i ma le Pelu”

Le Atua e, aumai mo a'u Sikotilani,
a leai e sili ona ou oti!

mai le itulau e 6
E leai ma se isi na faalavelave i le lauga a Nokise. Na mae'a le lauga ae alalaga fiafia Porotesano. E ui lava e toatele failauga Porotesano ua latou laugaina le Tala Lelei, ma o nisi o i latou na maliliu ai faamaturu i Sikotilani lava ia, peitai e le'i faapea ona faamalalamaina e se failauga

mafuaaga e tatau ai ona toe fuata'ina le Ekalesia. Fai mai foi isi e le'i faapea foi ona tuusa'o manatu o Uisati e pei o Nokise, ae o lea na susunuina i le fata musaesae. Ua talitonu nei tagata, o Nokise le isi lea o le a sosoo ona susunu se'ia oo ina oti, oti faamaturu. Na tala'iina e nisi Katoliko se fonu e fesiligina ai Nokise ma

lana lauga na fai. Ae na matua manino ona faamalalamama e Nokise mataupu na ia laga, ma ua le magagana ai i latou na fia faaoolima ia Nokise. Ona faaiiua ia lea e Nokise le faatasiga i upu nei:

O le Ekalesia leni e mo oe pe a e manao iai, e le mafai ona ou taofia oe, ae mo a'u lava ia, ou te le filifilia se isi lava Ekalesia, vagana lea e avea ai Iesu Keriso ma ona faifeau, faalogo i lona siufofoga, ae le o le leo o se tagata ese.

mai le tusi: “God's Generals”, tusia e Roberts Lardon faamatalaina e Afemata T. Apelu Aiavao

O le Ao e Iloa Ai

The Cloud of Knowing (Esoto 13: 17-22)

E le toe tau faia se tala i le “Esoto” - le o 'ese mai o le fanauga a Isaraelu mai Aikupito, aua o se tala malamalama. I le vaega o le tala lea sa faitauina, e le'i faigofie ia Farao ona tuu atu le nuu o le Atua e o pei ona talosagaina e Mose ma Arona. A na le faia e le Atua le mala mulimuli na pa ai le lauaitu a Aikupito ona o a latou ulumatua, e le matuu mai le finagalo o Farao. Ao Isaraelu e le o se nuu faigata; o se nuu ua masani ma le ola pologa; masani i

le na ona faalogo i o latou matai, o le a le mea e fai mai ai o lena e tatau ona fai.

Atonu o le ala foi lea na filifili ai e le Atua le ala umi e faataamilomilo ai lona nuu i le vao. Ua le o le ala puupu mai le vao o Sinai, ma faasasa'o ai loa aga'i i Kanana, a ua taamilomilo solo i le vao mo le 40 tausaga. O'le a le uiga? O se falea'oga mo Isaraelu i le ola usitai. Se'i a'oa'o le nuu i le faalogo i le Atua ma usitai.

E le o toe faataamilomiloina e le

Atua lona nuu ma ona tagata faatuatua, aua ua uma ona ia aumai Iesu o le ala sa'o e vave ai ona oo le tagata usitai i manuia faalelagi na ia folafola mai. O la le Alii o Keriso - *faauta, ou te ia te outou pea e oo lava i le faavavau*. O le faaogaina o tagata e le Atua - ua iai lava le ao faamalumu na te taitaina le faigamalaga i le lalolagi. O Iesu Keriso, o le Ao lea e le se pe tauto'ai ai se malaga, aua o ia o le Ao e malamalama ai soo se vaipanoa o le ala; o le Ao e iloa ai magaala uma e tau atu i le ola faavavau. *O A'u nei, le Ala, ma le Upu Moni ma le Ola*.

- Palemia Tauiliili FT

Tavita le Ta Kitara i le Maota o Saulo

E le na o le leoleo mamoe e lelei ai Tavita; e lelei foi i le ma'ata; toe lelei i le ta kitara e faafiafia ai le tupu o Saulo i lona maota. Ae toetiiti lava oti ai.

O le la lava e taolo le taina o le kitara a Tavita, ma pese, pei lava ona fai e tamaiti Samoa i ni faafiafiaga, ae te'i ua patatu le tao i le pa o le fale i tafatafa o Tavita. Na te'i Tavita ina ua vaai atu i le tao i ona tafatafa ma na iloa ai, o ia na fuafua iai le tao. Ona sola ai lea o Tavita i lea po.

O le lelei o Tavita i ana taua ma fili o Isaraelu, lea na fasiotia ai e Tavita tagata Filisitia e 200 i le isi taua, na mafua ai ona tuuina atu e Saulo lona afafine o Mekala e fai ma ava a Tavita. Ae ui lava ina faia e Saulo lea mea e pei e fai ma tau i Tavita ona o lona manumalo ia Filisitia, ae ua tupu pea le fua o Saulo ona o le lelei o Tavita i taua, ma fia fasioti ai i lona “son in law,” - poo le tane a lona afafine.

Na iloa e Ionatana le ita o lona tama ia Tavita, o lana uo, ona ia

fai atu lea i lona tama: “Aua ne'i agaleaga le tupu i lana auaua o Tavita, aua e le'i agaleaga o ia ia te oe...na ia tuu foi lona ola i lona lima, ma na fasi le Filisitia, na fai ai foi e le Alii le faaolataga tele mo Isaraelu uma, na e iloa foi, ma fiafia iai; se a le mea e te agaleaga ai i le tagata e le sala, ina a e fasioti fia ia Tavita?” Ua faalogo Saulo i le upu a Ionatana, ma ua tauto ai Saulo, o loo soifua le Alii, e le fasiava lava o ia.

Peitai e le'i mūta ai lava le taumafai o Saulo e fasioti ia Tavita.

O le Mafuaaga o le Pese:
**All Creatures of our
God and King**

O mea matagofie ma le ofoofogia o le foafoaga e faaali ai le mamalu o le Atua ma latou viia ai o ia. Mai le agaga lotu mialie o se monike Italia i le tausaga e 1225, ua tatou maua mai ai lenei fe'au matagofie. O Sagato Faranisisi o Asisi (St. Francis of Assisi), na ia iloa atu 'a'ao mamana o le Atua i lana foafoaga uma na ia faia. Ona ia fautuaina ai lea o tagata uma ina ia latou tali atu i lea matagofie i lo latou alalaga i viiga ma aʻleluia.

O Tiovani Penatone (Giovanni Bernardone, le igoa moni o Sagato Faranisisi, na ia faaalua i lona

soifua le tauagafau, le lotu maulalo ma le agaga faamagalo ma le matua faamoemoe i le Atua o loo 'u'una'ia e lana pese lenei ina ia faia e tagata uma.

O le 25 o ona tausaga na fulitua ai i lona olaga leaga a o fitafita, fulitua i le 'oa e tele na ia maua mai lona 'aiga, ma taumafai loa e ola i nai mea iti na te maua, e pei o lona Alii o Keriso.

I lona soifua atoa na ia matua fiafia i le faatauaina o viiga i sauniga lotu, ma ia u'una'ia le pepese i sauniga e faia i lona monaseri (nofoaga o monike). Na

ia tusia ni viiga se onosefulu mo lea faamoemoe. O le lagiina malie o le pese - All Creatures of our God and King, ua faaauuina lava i nei senituri e tele ua mavae. O se tatalo foi na tusia e Sagato Faranisisi ua lauiloa foi ma matua fiafia iai tagata: O loo tusi atu i lalo i le gagana Peretania:

Lord, make me an instrument of Thy peace. Where there is hatred, let me sow love. Where there is injury, pardon, Where there is discord, unity. Where there is doubt, faith. Where there is error, truth. Where there is despair, hope. Where there is sadness, joy. Where there is darkness, light. For it is in giving, that we receive. It is in pardoning, that we are pardoned. It is in dying, that we are born to eternal life.

Aso Fanau

O Alexander the Great, (Alesana le Sili), Julius Caesar, Plato ma Philip Melancton na maliliu uma i o latou aso na fananau ai. O John Hus poo Ioane Hasi, le maturo Kerisiano lea na faasalaina e le Ekalesia Katoliko Roma ma susunuina i le afi se'ia oo ina oti ai, o lona aso fanau na faaoo ai le faasalaga. E sili i le 500 tausaga talu ona uma ona faaoo le oti ia Hasi, ae faato'ese le pope ona o lea mea na fai e le Ekalesia i se tasi o'toa o le Ekalesia Kerisiano.

O le tupu o Filipino o Maketonia, king Philip of Macedon, o lona aso fanau na ia manumalo ai i se tasi o ana taua iloga i lana nofoaiga.

O le aso fanau o Charles Kingsley na tuuina atu ai lona ola mo Keriso. O le aso fanau aupito sili ona inosia o le aso fanau na siva ai Salome i luma o le tupu o Herota ma tamaloloa 'onana ma lau ai lona manao i le ulu o Ioane le Papatiso, ina ua fesili Herota pe o le a se mea e manao ai, soo se mea lava. O lana tali, o le ulu o Ioane le Papatiso.

All Creatures of our God and King

All creatures of our God and King, lift up your voice and with us sing, Alleluia, Alleluia! Thou burning sun with golden beam, they silver moon with softer gleam: O praise Him, O praise Him!
Alleluia, Alleluia, Alleluia!

Thou rushing wind that art so strong, ye clouds that sail in heav'n along. O praise Him! Alleluia! Thou rising morn, in praise rejoice, ye lights of evening, find a voice: O praise Him, O praise Him!
Alleluia. Alleluia. Alleluia!

Dear mother-earth, who day by day unfoldest blessings on our way, Oh praise Him! Alleluia! The flow'rs and fruits that in thee grow, let them His glory also show: O praise Him, O praise Him! Alleluia.
Alleluia. Alleluia!

Let all things their Creator bless, and worship Him in humbleness - O praise Him! Alleluia! Praise, praise the Father, praise the Son, and praise the Spirit, Three in One: O praise Him, O praise Him! Alleluia, Alleluia, Alleluia!!

Let all things their Creator bless, and worship Him in humbleness - O praise Him! Alleluia! Praise, praise the Father, praise the son, and praise the Spirit, Three in One: O praise Him, O praise Him!
Alleluia, Alleluia, Alleluia!

O Lima Faaloaloa Mai o le Alofa Faamagalo

O i latou o ta'ua i lenei tala, e le o ni tagata e te manatu o le a iai i se lisi o tagata e mama ma ua avea ma tagata pa'ia. O le mea moni lava, o ni mea na latou faia, ma nisi o o latou uiga faaaliga, e faamanatu mai ai ia te oe taimi i po o Asc Toonai i falepuipui ma mea e masani ona aliali ai. Ae mata'ina lava ona o uiga lava ia faatagata soifua e masani ai le olaga, e le ufiufia pe 'alo'ese ai le vaai. A o ia uiga e faamanatu mai ai le faapalepale ma le onosa'i o le Atua. Afai lava e te tau fesilisili pe faapefea ona faaaogaina oe e le Atua e sui le lalolagi, ona tatau lea ona e vaavaai lelei i tagata oi le lisi lenei a le Atua.

O ai ia tagata? O tagata na filifilia e le Atua latou te atofuli pe sua le lalolagi. O e ua i tua o le maea ona o ni mea faaletonu na latou faia, a ua filifilia e le Atua. O tagata ua latou maua le faamoemoe ma le toefuata'iga i 'a'ao faaloaloa mai o le Atua. 'A'ao talia o le toe fo'i atu i le alofa faamagalo o le Atua.

Tatou amata mai ia Aperamo. E ui lava sa vivii e le aposetolo o Paulo ona o lona faatuatua, a o lenei Tama o le Nuu na Folafolaina e matua anoanoa'i ona faaletonu. E matua tala pepelo lava Aperamo. O le isi aso na tala pepelo ai ina ia sao ai lona ola, ma fai mai o Sara e le o sana ava a o lona tuafafine. E le 'ato'atoa ona sa'o lea faaaliga. E le'i umi ae toe talapelo foi ma fai aga'i i lana ava o Sara a o vaavaai mai tagata, "O lo'u tuafafine."

O se faaaliga lea o sou talitonu i folafolaga a le Atua? E mafai ona e atia'e se nuu na folafola mai i lea ituaiga faatuatua? O le tali, e te le mafai, ae mafai e le Atua. Mata'utia! E mafai e le Atua. Ua 'apoina e le Atua le mea lelei, ma ia faamagalo le

mea e leaga, ma ia faaaogaina laugutu tala pepelo, e amata fausia ai le nuu fou.

O le isi igoa lauiloa, o Mose. O le mea moni o se tasi lenei o tagata logologoa i le tala faasolopito o le lalolagi. Faato'a alia'e lava ma iloa e tagata ina ua valusefulu ma ona tupu ona tausaga. Ae sa perenise i le 'aiga tupu o Farao, oo ai ina fesolasolaa'i ona ua ia fasiotia se isi. E te filifilia se tagata fasioti tagata faapea, o loo fesolasolaa'i solo nei maua o ia, ae o le a filifilia e ta'ita'iina ese se nuu mai le nofo pologa? E te filifilia se ituaiga tagata faapea na te tau'aveina papamaa o Tulafono e Sefulu, lea o loo iai le tulafono: 'Aua e te fasioti tagata? O le tali, na filifilia e le Atua. Atonu e te le filifilia ae filifilia e le Atua. Na valaauina o ia mai le laau talatala o loo mu ae le faaumatia. Matua mata'utia uiga paia o le Atua!

Tatou oo ai i le tagata o lona faitaaga na oo ina to ai le fafine, taumafai lea e tuua'i le fua o lana agasala i le to'alu o le fafine, toe fai lana faatonuga e oti ai le tane a le fafine lava lea i le taua ae se'i o la nonofo. Matua tumu Tavita i le faitaaga ma le fai togafiti leaga. A o le mea sa aupito sili ai, o lona loto salamo: Faalogo fo'i i nisi o upu o lona salamo: 'Le Atua e, ia e alofa mai ia te a'u, e tusa ma lou lava alofa; e tusa ma le tele o lou alofa mutimutivale, ia e soloiuese o'u solitulafono. Ia e matua fufulu mai ia te au i la'u amio leaga, ma ia e faamama mai ia te a'u i la'u agasala.' -

Salamo 51:1,2.

E iai fo'i Iona i le lisi o tagata na filifilia e le Atua. O ia o le amapasa i Nineva. Ae le'i mana'o e faia le finagalo o le na tofia ma auina o ia, ae fia fai lona lava loto. E le'i fia alu i Nineva le nuu faapaupau. Ona oso ai lea ua alu i le isi vaa. Na lafo i le sami e seila o le vaa ina ua afatia le malaga, ma foloina ai e le i'a tele se'i a'oa'ia ai. Ae oo lava foi i lenei i'a tele na te le'i lavatia le iai o Iona i lona manava, ma toe pua'iina mai ai i fafo Iona ma lafoia i matafaga o Nineva.

E umi le lisi o tagata e pona ma pisipisia o latou tagata, ae na filifilia e le Atua e tauala mai ai lona finagalo i le lalolagi. O Elia le perofeta; Solomona le tupu na fia selau lana 'autaunonofo; Komeri le fafine talitane. E oo lava foi i le gafa o Iesu, o loo 'emo'emo mai ai faataetuli igoa e pei o Tamara le fafine mulilua, Raava le talitane, ma Patisepa le fafine ta'ele'ele faatosina i lona vai i le tinitini o le la ae iloa lelei atu e tagata.

O le lesona tatou te maua mai le lisi o nei tagata e matua tele o latou pona, e faaaogaina e le Atua i latou, o tagata. E le o ni tagata amiotonu, pe o ni tagata pa'ia, tagata popoto, tagata iloga ma ta'uta'ua. A o tagata tala pepelo, fasioti tagata, mulilua, faitaaga, to'ilalo, le usita'i. O mea sa le lelei ai i latou, na fa'a'ato'atoaina e le Atua i lona alofa. Alofa anoanoa'i! Alofa faamagalo.

Na faamatalaina le alofa a'ia'i o le Atua e Iesu i lana faata'oto. Fai mai o le tama talavou ua fii i ola i le faato'aga mamoe a lona tama. Tagi ai lea i lona tama i ni tupe o lona tofi, ua faotaga, ma alu loa i le lalolagi tele o faatalitali mai. O le mea na ia maua ai o talavou tataa, leai ni galuega, aisi, fia 'a'ai, ma le momoe solo i poletito o fale. Toe salamo loa i lana mea na fai ma lona tuua o lona aiga ma mea'ai e tele o faulala'i

faacauau itulau e 10

A'oa'oga o le Malo

saunia e
Magele Tufulasi Isaako
EFKS Lotopa

Tusi Faitau: Iakopo 3:1-12

Matua: Iakopo 3:10: "E luai mai e le gutu e tasi le vivii ma le fetuu. O'u uso e, e le tusa ona faia faapea o na mea."

Manatu Autu: O A'oa'oga o le Malo

O a'oa'oga o le malo o le Atua e taua mai le aposetolo o Iakopo, e faatatau i le laulaufaiva ma le leaga e tupu mai ai. Ua faamatalaina e Iakopo, o le laulaufaiva o le tasi o itutino e sili ona laititi, e malulu fo'i aua e leai ni ponaivi, ae matua sili lona mata'utia i mea leaga e tutupu mai ai, pe a le pulea lelei.

Ua faatusaina e Iakopo le laulaufaiva i le faagutu o le solofanua, ma le foeli itiiti o le vaa tele i lona malosi e mafai ona faatonuina ala o solofanua ma le vaa. Ua faatusaina foi e Iakopo le laulaufaiva i le a'fi mumu ma le puna o mea oona i lona mata'utia e oti ai ma malaia ai tagata.

Ua a'oa'o mai foi Iakopo, e leai se tagata e mafai ona faalaina le laulaufaiva, o le mea lea e tatau i tagata ona pulea ma le faautauta ma le alofa le faaogaina o tatou laulaufaiva, ina ia aua ne'i o tatou malaia ai ma afaina ai isi tagata.

O le mata'utia o le laulaufaiva e pei ona a'oa'o mai Iakopo, ona o le laulaufaiva lea e tasi o loo tatou vivii ai ma fetuu ai le Atua ma tagata. O se mea e matua le talafeagai, sese, ona tatou faia. O loo a'oa'o mai Iesu, ma o lea foi ua toe faamanatu mai e Iakopo, e pei lava ona le mafai e le mati ona fua mai i le olive, poo le vine ona fua mai i le mati, e faapena ona le talafeagai ma le tatau, i le

laulaufaiva e tasi ona vivii ai i le Atua, ma fetuu ai tagata. E pei foi ona le mafai e le puna e tasi ona puna mai ai le vai suamalie ma le vai oona, poo le vai magalo ma le vai mai, e faapena ona matua le tatau ona vivii ma fetuu i le laulaufaiva e tasi.

O lona uiga o le a'oa'oga o le Malo o le Atua, fai mai Iakopo, E le tusa ona tatou faia ia mea. O le malo o le Atua e na o mea suamalie, manogi lelei, filemu, fealofani, fiafia, ma amiotonu.

Olaina i le Olaga

O le fatu ma le ogatotonu o le

Malo o le Atua, ia tatou olaina a'oa'oga i o tatou olaga o aso ta'itasi. O le mea silisili lea ona taua ma talafeagai mo tatou. Ia faatino ia tatou gagana, ma galuega fai o aso taitasi. E lelei le faalogo iai, e lelei foi le iloa ma malamalama i a'oa'oga o le malo o le Atua, ae le faasaoina ai tatou i le Malo. Fai mai le taule'ale'a mau'oa ia Iesu, 'Se a se mea ou te faia ina ia ou maua ai le ola e faavavau?' Fesili Iesu: 'Ua e iloa tulafono?' Ioe, le Alii e, na ou iloa mea uma talu ina o ou tamaitiiti. Alu loa e faatau atu mea uma ma tufatufa i e matitiva. Ona alu ese lea ma le faanoanoa, aua e tele ana oloa.

O le amio tatou te olaina i aso ta'itasi, e sili ona taulia nai lo se isi mea i a'oa'oga o le Malo o le Atua.

O Lima Faaloaloa Mai o le Alofa Faamagalo

mai le itulau e 9

ai. Toe fo'i loa i lona aiga.

A o i le ala sa mafaufau i sona 'otegiaga e lona tama. Mafaufau foi i sana lauga e fai i lona tama ma faato'ese iai. Ae poo le a foi sa na mea e fai pe a alu atu ae tuli ia e lona tama. Ua fai lelei lava ana upu e fai i lona tama pe a taunuu.

Peitai na te le'i faaogaina. Aua e oo atu i le pi'oga o le ala e iloa atu ai lo latou fale, e vaai atu o tu mai lona tama, iloa mai loa ia, faaloaloa mai loa ma lima, ma tamo'e mai, ma fiafia mai ua toe fo'i mai lona atalii, ma faamagalo mai iai. Ua tago mai ma fusi atu ia te ia ma la fetagisi faatasi.

E faapea lava foi lima faaloaloa mai o le Atua na faatalitali mai i le toe fo'i atu o Aperaaamo, Mose, Tavita, Iona, ma isi. Leai se otegiaga; leai se lau mai o lea mea ma lea mea leaga. Na o lima faaloaloa ma fusi atu i le alofa

mafanafana o le tama i le atalii salamo ua toe fo'i i le aiga.

Lima mafanafana ia na faaloaloa mai i le satauro a Roma, faaloaloa atu i le lumana'i o tupulaga agasala ae salamo ma toe fo'i mai.

Pei o le matuamoa ona o faofata'i mai o lana toloa'i! Pei o le leoleo mamoe ua faafafa mai le mamoe na leiloa, ma o i le fale. e aai i mea'ai o loo manogi mai ai. Mea'ai o le fiafia ua amata ona o le mamoe e tasi na se, ua toe maua.

New Heaven and New Earth

Where all is new and never shall be old, For time is not, nor age nor slow decay, No dying eyes, no hearts grown strange and cold, All pain, all death, all sighing fled away

ITULAU MO TUPULAGA TALAVOU

Li Van Vu

O le tala i le ulugalii mai Vietiname

mai le itulau muamua

masani lava ona ui ane i lumafale se taule'ale'a Vietiname ma ana tonati e faatau. E le lelei lana nanu faa-Peretania, ae ui lava ina le lelei lana nanu, ae ese le faamasani tagata. E tele lava ina faalava lana nanu i ana taga e fai i ona lima ma lona tino. Na oo ina ma iloa lona igoa o Li Van Vu.

I le ao, e faigaluega ai Li ma lona to'alua i le fale fai falaoa e tao ai ma isi mea. Ae a oo i le po, ona faalogologo lea i lipine o a'oa'oga o le gagana Peretania. Mulimuli ane ona ma iloa lea, e momoe Li ma lona to'alua i luga o taga penu'ili, i le fola o le potu ei tua o le fale tao falaoa.

O le aiga o Li Van Vu i Vietiname, o se tasi lea o aiga aupito mau'oloa e le gata i Vietiname a o le Atua Asia atoa. Toetoe lava o le tasi o vaetolu o le tama'o'aiga o Vietiname i Matu e pule ai le aiga o Li. Peita'i, ina ua fasiotia faamo'amo'a le tama o Li, ona sosola ai lea o Li ma lona tina i Vietiname i Saute, ma a'oga ai se'ia oo lava ina avea ai o ia ma loia. Na mulimuli Li i tulagavae o lona tama, ma oo ina matua mau'oloa ai foi lea o ia. Ina ua amata to'atele fitafita ma tagata Amerika i Vietiname i Saute, ona amata ai lea o lana pisinisi o le fau o fale e nonofo ai lenei anoano o tagata Amerika, se'ia oo ai lava ina avea o ia o se tasi o tagata faufale iloga i le atunuu.

A o sana malaga i Vietiname i Matu na pu'eina ai o ia ma lafo i le falepuipui mo tausaga e tolu. Na oo

ina mafai ona ia fasiotia ni fitafita se to'alima, ma sola ai i Vietiname i Saute, lea na toe pu'eina ai foi o ia, ona ua masalosalo Vietiname i Saute, o ia o se sipai a Vietiname i Matu.

Ina ua mae'a lona faasalaga, ona amata ai lea o lana pisinisi vaafagota, lea na oo ina avea ma fuavaa fagota ma fai 'apai'a aupito sili ona tele i Vietiname i Saute.

Ina ua mautala Li o le a tuua e fitafita Amerika, faapea ma le ofisa o le amapasa o Amerika ia Vietiname i Saute, ona fai ai lea o se faai'uga faigata e Li - ua faopusa uma ana auro sa faaputupu, uta i se tasi o ona vaafagota aupito tele, ma faasagasaga lona taumua i le vasa loloa. Ona ia saili ai lea o so la avanoa i le tele o vaa o fefaataua'iga o loo iai, ma totogi ai ia la auro le la sola'aga mai lo la atunuu. Na alu le la sola'aga i vaa, se'ia oo ina la taunuu i le Atua Filipaina, lea na pu'eina ai i la'ua ma tuu i le nofoaga o tagata sulufa'i.

Na maua se avanoa o Li e feiloa'i ai i le peresitene o le Atua Filipaina, ma ia talosagaina ai le peresitene, pe mafai ona tuu ane se isi o ona vaa na te faaogaina. Na mafai, ona toe amata ai foi lea o le pisinisi vaafagota a Li. E uma ane le lua tausaga talu lea aso, a ua mae'a ona toe faatulagaina atoa e Li faigafaiva a tagata Filipaina, ma amata tapenapena ai mo lo la malaga atu i Amerika, o le faamoemoe atoa lava lea o le la sola'aga - o Amerika.

Peita'i, a o aga atu i Amerika, ae amata ona faaletonu le mafaufau o Li, ua pei ua fiu i le toe tau amata foi o le olaga i Amerika. E maua atu e lona to'alua, o le a oso ifo mai luga o le vaa ma pule ai i lona ola. Na valaau atu iai lona to'alua, "Li, a e oso, ma e oti ai, ae faapefea a'u? Ua leva ona ta ola faatasi. Ua tele tausaga o ta

mafatia faatasi ma ta sao mai ai i le tele o faigata. E mafai ona ta manumalo mai nei faigata e tele." O upu ia a si fafine na toe loto tele ai Li.

Ina ua taunuu Li ma lona to'alua i Houston i Amerika i le tausaga e 1972, ua aunoa ma se auro poo se isi tupe o toetoe ia la'ua. E le iloa foi fenanui i le gagana Peretania. Peitai, o le aganuu a Vietiname, e fetausia'i 'aiga ma fesoasoani le isi i le isi. O le mea lea na fai e le kaseni o Li ia ia ma lona to'alua, ua avane se potu i tua o lona fale fai falaoa, e nonofo ai Li ma lona to'alua.

O le taimi lea faato'a amata ona faatu le ma pisinisi 'oti ulu pe na o le luaselau futu le mamao ma le fale fai falaoa.

A o le fe'au taua lenei mai lea amataga faatauva:

Ua ofo ane e le kaseni o Li ni galuega mo Li ma lona to'alua, i lona fale fai falaoa. O o la totogi, o Li e \$175 i le vaiaso, a o lona to'alua e \$125. O le tuufaatasiga o o la totogi i le tausaga, e \$15,600. Ua ofo ane foi e le kaseni le fale fai falaoa mo la'ua pe a mae'a ona la totogiina atu le \$30,000, a o le paleni o le tau atoa, e \$90,000, o le a fesoasoani atu le kaseni i le totogiina. O le mea lenei na fai e Li ma lona to'alua:

Ua faaauau pea ona la nonofo i le potu i tua o le fale fai falaoa. E o ta'e'ele i paipa i faleuila faitetele o le aai. Mo tausaga e lua, o a la mea'ai na o mea lava e maua mai le fale fai falaoa. E lua tausaga, o la i le na o le \$600 i le tausaga, sao mai ai le \$30,000 o le tupe e totogi i lalo ona la mauaina ai lea o le fale fai falaoa.

Na faamalalama e Li e faapea, ana o e nonofo i se falemautotogi, o lona uiga e totogi fo'i; o lona uiga foi la, e tatau foi ona faatau ni meafale; ona mana'omia ai foi lea o se taavale; o lona uiga e mana'omia foi se pisinisi; o lona uiga o le a soona feoa'i foi i le taavale ma alu ai isi tupe, ma le mafai ai ona maua se \$30,000 o le tupe e totogi muamua i lalo faato'a la maua ai le pisinisi.

Ae le gata ai i ina le ola aputiputi o faaauau itulau e 12

ITULAU MO TUPULAGA TALAVOU

Li Van Vu

mai le itulau e 11

Li ma lona to'alua. Ina ua uma ona totogi le \$30,000, ona toe talatalanoa ai foi lea o le ulugalii, pe faapefea ona totogi le \$90,000 na fesoasoani ane ai le kaseni o Li i le sailia. Ua

toe fuafua e toe ola aputiputi mo le isi tausaga atoa ae faasaosao tupe mama e maua mai le la pisinisi, e totogi ai le \$90,000 lea o totoe o le aitalafu. E uma ane le tolu tausaga, ua mama atoa le aitalafu, a ua ola ola tetele le pisinisi na la faataua, ma la ola matitiva ai mo tausaga e tolu.

“Sa fai A'u ma Tagata Ese, ona outou talia lea o A'u”

Na ou auai i se Fono Tatalo pe tusa o le fa tausaga talu ai. Na ou lagona lava le musumusuina o a'u e le Agaga Pa'ia ina ia ou fautuaina malosi tagata ina ia mulimuli i mea o fai mai ai le Mataio e 25: 35-36: “.....aua na ou fia 'ai, ona outou avane ai lea ni meaai ou te 'ai ai; na ou fia inu, ona outou avane ai lea ni vai ou te inu ai; sa fai a'u ma tagata ese, ona outou talia lea o a'u; na ou le lavalava, ona outou faa'ofuina lea o a'u; na ou ma'i, ona outou asiasia mai lea o a'u; na ou i le falepuipui, ona outou o ane ai lea ia te a'u.....aua na faia e outou i le tasi o e aupito itiiti o o'u uso nei, o a'u lea na outou faia iai.” Na faagesegese lava ona ou tautala, ma le maligi o o'u loimata ona o le ogaoga o nei upu. A ua maligi foi loimata o isi o faatasi ai.

E alu le vaiaso na sosoo ai o mamafa lava ia upu i lo'u mafaufau. Ona fai ai lea o la'u fuafuaga - o Aso Tofi uma lava, o le a ou alu ai i le galuega ma ni saniusi se lima. Ta loa le sefululua, ona ou savali ai lea i le alatele ma tufa atu i nisi o tagata e leai ni 'aiga o loo iai.

Na ou faafesoota'i nisi o a'u uo mai le Fono Tatalo, ina ia matou feiloa'i i le fale'aiga i le taeao o le Aso Toonai, ae ia tofi mai le tagata ma ni ana saniusi se lima. Oo i le Aso Toonai, matou toe feiloa'i, fai le matou tatalo. Ona matou savavali ai lea ma tufatufa saniusi i nisi o le 'au nonofo i alatele

ona o le leai o ni aiga. E 15 saniusi na matou tufatufaina, ma fai se upu faamafanafana i tagata.

Ua silia nei ma le lima tausaga e le'i misia lava se Aso Toonai o fai le matou mea lea. Ma o a matou lava tupe sa faaaogaina ai.

Ua to'a 14 nei matou, a tuu faatasi a matou pepa saniusi ua 70. Faaopoopo iai ma le mana o Keriso e ala atu ia

Ona faato'a alu ai lea o Li ua saili ma faatau lo la fale fou. E oo mai nei, o loo teu pea se vaega tele o le la tupe e maua i le pisinisi, ae la te faaaogaina na o se vaega itiiti. Ma le la tulafono, la te le aitalafuina se mea, e totogi tupe uma mea la te mana'omia.

I aso nei, ua matua milionea faafia ia Li ma lona to'alua.

matou talosaga. Pe o le tusa lea o le tolu i le fa'afe tagata matou te fafagaina i le tausaga. Poo le 14,000 saniusi ua matou tufatufaina atu talu ona matou faia o lenei mea.

O le to'alua o le matou vaega, o nisi na matou fafagaina i le amataga. Na oo ina maua a la galuega, maua ma ni o la fale, ma taavale, ona liliu mai lea ua matou galulue faatasi i Aso Toonai. O nisi foi o matou, ua le na o saniusi, a ua o mai ma isi foi mea'ai, e pei o fa'iota, 'apu, moli, pea, totini, ma seevae, ma isi.

O le galuega na amata mai i saniusi e lima ma le tagata e toatasi, a ua tupu; ma avefa foi lenei galuega ma auala e musumusuina ai i latou, o mafatia, i le faaolataga oi ia Keriso.

tusia e

Anesa C. Cronin

E le maua le Fiafia atoatoa i Tupe

E faamalamalaina le manatu lea o loo i le ulutala, i se tala i ni tupu se toalua. Croesus, (Koloese) o le tupu o Litia (Lydia) na fanau mai i le tausaga e 590 a o le'i soifua mai le Mesia. E matua mau'oloo lava, ma ola le taofiofia le faaaogaina o ana 'oa. O Solon, o se tasi o tagata popoto e to'a fitu o le malo o Eleni, na asiasi atu ia Koloese ma ua faaulufale atu o ia i le ma'ota matagofie o faaalai ai le 'oa e tele a le tupu. Ae na ita Koloese ona e aunoa ma se ofo o Solon i le anoanoa'i o le tamao'aiga o Koloese. E leai ma ni ana tala vivii ma maofa i le 'oa a le tupu. Ona fesili atu ai lea i Solon le tamalii pototo ma le fai tofa mai Eleni, “Aisea e te le manatu ai o a'u le

tagata pito fiafia ona o le tele o lo'u tamao'aiga?”

Fai mai le tali a Solon, “E le mafai ona avefa se tasi ma tagata aupito sili ona fiafia, pe a le pulea lona ola e le Atua se'ia oo i lona oti.”

O le isi foi tupu mai anamua, o Cyrus (Kuresa) le tupu o Peresia, sa matua alofagia o ia e ona tagata. O se tupu na matua tele foi lona tamao'aiga, peitai o le tele o ana 'oa, na ia toe avatu mo ona tagata. Ona fai mai a ia, o a'u 'oa aupito sili ona taua ia te a'u, o loto ma le alofa ma le agalelei o o'u tagata.

O Kuresa leni e tele ona tala i le Tusi Paia. Sa fesoasoani foi i le nuu o Isaraelu, e ui lava o ia o se tupu o nuu ese.

O E UA FAI'ILAGI LE FOLAUGA

Seiuli Lepetia Tia

26 Ianuari 1949-13 Iuni-2015

O le Susuga i le A'oa'o Fesoasoani ia Seiuli Lepetia Tia na soifua mai i Paia, i le aso 26 Ianuari 1949, ae tuumalo i le aso 13 Iuni 2015 i le Mercy Hospice i Ponsonby, Aukilani, Niu Sila.

Na faaiipoipo atu i le tama'ita'i o Vaimooi'a Ainuu o le nuu o Sapapalii, ma e to'afa o la alo, 2 tama-2 teine.

O lona sauniga faaleaiga sa faia lava i le malumalu o le EFKS Westmere sa ou ta'ita'iina. O le Susuga i le A'oa'o Fesoasoani Taliaoa Sanerivi na saunia le upu faamafanafana, o le Susuga i le A'oa'o Fesoasoani ia Seiuli Toelupe na saunia tatalo, ae ou faitauina le Tusi Paia.

O ona toe sauniga sa faia lava i le malumalu o le EFKS Westmere i le Aso Faraile 19 Iuni 2015 i le itula e 10 i le taeao. O le Susuga i le faifeau Toea'ina ia Fiatepa Fa'ee na ta'ita'i. O le Susuga ia Fetulia'iina Pama (ATN) na faaulufaleina le sa o le A'oa'o. O le Susuga ia Fuata'i Misi'aita na tatalo a o le Tusi Paia na fofogaina e le Susuga ia Peniamina Leota FS. O le Susuga Togafiti Tua'oimalii na saunia le upu faamafanafana, a o a'u na molimauina lona soifua galue mo le Alii o Keriso Toetu.

O le Fetalaiga ia Timu Sitivi Vivi na tula'i e fai ma sui o Aiga na Lua. O le faletua ia Vaimooi'a na molimau i le la mafutaga ma le Susuga i le A'oa'o. Sa maua foi le avanoa e molimau ai le Susuga i le Toeaina o Lucky Slade ona o le tele o le 'sao taua o le Susuga ia Seiuli mo le Matagaluega a Aukilani e ala i taaloga a Aulavou Soofaatasi.

O le A'oa'o ia Seiuli ma Vaimooi'a le isi matafale na iai i le tau amataina o lenei aulotu. O se auuuna galue malosi, e ui e le'i leva ona matou mafuta, ae feagai ma le gasegase (stroke) tuga.

O Seiuli o se auuuna finau ma faitaulaga mo le galuega. E tausi faifeau ma e lagolago tele i le ma galuega, aemaise lava i le Aulavou ma le A'oga Aso Sa. Mae'a ona toe sauniga ona faai'u lea i lona oliolisaga tumau i Mangere, Aukilani, ma

matou faamavae ai i le uso, o le auuuna a Keriso, i le pese a le 'Au Kerisiano, Talofa uso e, tofaina oe!

Manuia lau malaga Seiuli.
Vagatai Vaaelua FS
EFKS Westmere

Te'o Sale'a'aumua Avaitoga Toelupe

1 Me 1937-9 Me 2017

O le Afioga ia Te'o, le faletua o le Afioga i le Ti'akono ia Tolofua Lesa Toelupe, na soifua mai i le aso 1 Me 1937 i le nuu o Vaovai Falealili, ae malii filemu i le maota o nai o la alo i Massey, Aukilani i le aso 9, Me 2017. O ona matua o le Susuga i le faifeau Toeaina o Sofara Aiono ma le faletua ia Sale'a'aumua, ua faailagi le folauga.

Sa faaiipoipo atu ia Lesa Tolofua Liva Toelupe o Saleilua ma Leulumoega. O Lesa ma Salea'aumua ua tele tausaga o tautua i le EFKS i Faato'iaolemanu i le Susuga i le Toeaina o Malele Pitoitua faapea le Susuga ia Salu Epati, e ala i lo la tofi tiakono.

O le tausaga e 1997 na malaga mai ai i Niu Sila ma alala mau ai ma faapena ona galulue ai loa i le EFKS i Westmere nei.

Sa faia lona sauniga faaleaiga i le malumalu i le EFKS Westmere 14 Me 2017 sa ou ta'ita'iina, ma faitau le Tusi Paia. O le Susuga i le A'oa'o Fesoasoani

Fiapapalagi Kupa

5 Iuni 1925-5 Setema 2016

"Aua o lou ola ua ia Keriso, ao lou oti o lou manuia lea." Filipi 1: 21.

O Fiapapalagi Kupa o le tinā malōlō o le EFKS Tulaele.

O matua - Tamā - Nanai Misiuepa Nanai, Tinā - Faleolo Nanai.

Na soifua mai le Afioga o Sasina Savaii i le Aso 5 Iuni 1925 ae malii ia Setema i le aso 5 2016, ua atoa i ai le 91 tausaga ma masina e tolu le matua o lona soifua. Na faaiipoipo i le Faifeau

ia Taliaoa Sanerivi na saunia tatalo, a o le Susuga i le faifeau Faia'oga mai le Kolisi Faafaifea'u i Malua, Dr. Arthur Wulf sa saunia le upu faamafanafana.

O ona toe sauniga sa faia lava i le malumalu i Westmere i le aso 15 Me 2017 na ou ta'ita'iina, ona o le taimi tonu lea ua i Samoa le Usugafono a le Pulega. Na faaulufale le sa o le faletua e le Susuga Aliimau To'iaivao FS. Na tatalo le Susuga Togafiti Tua'oimalii FS, Tusi Paia na ou faitauina ma saunia le molimau o lona soifua galue, ae saunia e le Susuga ia Faaletaua Faaea FS le upu faamafanafana. Sa molimau le faletua o Lilemoli Siosifa Mafi ma le faletua o Lalofua Shumkuenip o alo o le Afioga ia Te'o i le mafutaga ma le tina, ona ua le atoatoa le soifua i le tino o le tama ia Tolofua. O le Afioga i le Tiakono Toea'ina le Tofa Ape Nonumalo Sofara na tula'i e molimau mo le aiga.

I le mafutaga ma le Afioga i le faletua o le Tiakono, o se tina sa faamōemoe iai lo'u to'alua i lana fautua, aemaise lava i lana lagolago i itu uma. O Salea'aumua faato'a ou iloa lava i le aso o lona sauniga faaleaiga ua suafa i le suafa Te'o. A o le ova i le 17 tausaga o matou mafuta, e le aliali mai sona suafa matai, ua leva ona faaee iai a o soifua ona matua. E galue loto maualolo ma e tau le lagona sona leo i fonu a le aulotu.

E soifua faitaulaga ma o se tina e pele ia te ia lana faifeau. O Salea'aumua ma Tolofua, la te le aivaleina se mea taumafa, ae muamua lava le faifeau.

Mae'a ona toe sauniga ona matou faamavae atu lea i le tina i lona oliolisaga tumau i le fanua malii i Waikumete, Aukilani, i le pese masani a le 'Au Kerisiano.....'Talofa uso e.....

Manuia lau malaga Te'o Sale'a'aumua Avaitoga Toelupe.

Vagatai Vaaelua FS
EFKS Westmere

mai Iva, Savaii o Rev Kupa Euta i le 1947. E to'aiva le la fanau ma nisi o fanau tausi e to'a fitu. Ua silia ma le lua sefulu tausaga talu ona malii le tamā ae lei faavaivai ai lona soifua ofo atu mo le Atua i lona soifuaga faa tagata Lotu. O sona fiafiaga ona ua aveva nisi o lana fanau ma meafaigaluega o le Talalelei, e pei o le Faletua ia Sauiuma na galulue ma le Susuga ia Faatauolua Mauala i le EFKS Falefa ui na fai i lagi lana folauga, o le Susuga i le Alii Faifeau o Niulala Kupa ma le Faletua o Loreta i faacuaui itulau e 14

O E UA FAI'ILAGI LE FOLAUGA

Fiapapalagi Kupa

5 Iuni 1925-5 Setema 2016

le EFKS i Tafua atoa ma nisi e oo i fanau o lana fanau o galulue i Ausetalia ma e ua a'otauina i le Kolisi i Malua. Na galulue i laua ma le tamā ia Kupa Euta FS i le EFKS Papa Puleia - 1948 - 1970. EFKS Matatufu Lotofaga - 1970 - 1980. EFKS Faleaseela Lefaga - 1986 - 1990. A'o le'i galulue i le la toe galuega i Faleaseela, sa muai galulue ma auai i le Faavaeina o le Ekalesia nei, ma fesoasoani ai i le Toeaina o Poasa Teo FT i le tausiga o le Aulotu nei i lona amataga. O ia o se tasi o tinā matua ao se toe tagata o lenei Aulotu, ma ua fa'ia ai se tasi o pou o lenei galuega ae ui o lea e le taumate i le alofa o le Atua e pau se toa ae toe tulai mai se isi toa o lenei aiga e faaauau le tautua mo le Alii.

E oge le gagana e faamatala ituaiga tinā ma tagata faapea, ona e ui ina faatutu gata i tulaga o le soifua, ae tauivi ma taumafai lava i lona agaga naunau, e le gata mo le aulotu aemaise i le Mafutaga a Tinā. O ia o le sili'aga i tulaga faa-tinā, e manatua gofie i taimi o Aso Faamanatu o Tina, ma isi Aso faapitoā aemaise o taimi o Asiasiga le faamati, e manao lava ia i le mea lelei ma le matagofie.

E soifua tausā'afia ma agalelei i isi aemaise foi lo maua aiga. E itiiti ana upu ae tele ma matagofie ana galuega faatino. E suamalie ia te ia le ola fai taulaga mo le Alii ma le alofa foai mo le Auauna a le Atua, o tagata ese ua mau ma ia. O se lagolago malosi mo i maua i le galuega aemaise o ona tiute faa-tinā i le Mafutaga a Tinā. E lei aunoa i maua ma ana fautuaga ma faalaeiau ma faamanuiaga auā tofiga ua aumai e le Atua.

Tau lava ina faateleina pea le viiga o le Alii i le soifua ofoina atu o lana auauna tinā nei. O lona toe sauniga na faia lava i le malumalu i Tulaele i le aso 13 Setema 2016. Na ou ta'ita'i, Iosefa Afutiti FS na molia le sa o le tinā i le malumalu, Tusi Paia o Letaulau Pesaleli FS, Tatalo o Eletise

Suluvale FS, Lauga - Tautua Aurelio FS (Kenese 23:20 ma le autu o le Aso - "Ia nonofo faatasi pea."

O molimau:

1. Niulala Kupa FS - Sui o le fanau
2. Solomona Tuatagaloa FT malolo - Sui o Aiga
3. O lau molimau i le itu Faaleagaga. O Pese na saunia lava e le Aufaipese i Tulaele. Na faai i lona sauniga mulimuli i lona nofoaga mau i lona aiga i Tulaele, na ou ta'ita'iina ma matou faamavae atu ai ia te ia i le Pese faatofa a le Au Kerisiano - 268. Tōfā, Tōfā, Tōfā.

Ia manuia lau malaga.

Fa'au'uga Mata'utia FT

E.F.K.S Tulaele.

Murraye Chu Ling Faresa

3 Mati 1947-12 Setema 2016

O Murraye Namulauulu Eti Faresa o le Faletua o le Tiakono i Tulaele. Na soifua mai i le Aso 3 Mati 1947, ae maliu i le aso 12 Setema 2016.

O ona matua - Tamā o Paleni Chu Ling Tapaleao Faleata, ao lona tinā o Siotalima Shu Ling - Taligalu Faleata. E to'a ono ona uso ma tuagane e toa 9. Na faaiipoipo i le tofā Namulauulu Eti Faresa. O le la fanau e to'a ono.

O ia o se tama'ita'i Fomai pasi Resitalaina o le Malo o Samoa.

Na fa'aiu lona olaga a'oa'oina i Niu Sila ma amata galue ai i Falemai i fafo, ma o le tele o isi vaega o lona soifuaga o Niu Sila.

Na foi mai ma le aiga i Samoa ma fa'auau ai lana tautua mo le soifua maloloina. O lana galuega mulimuli ma malolo ritaea ai, o se Faiaoga i le Iunivesite A'oa'o o Samoa i le vaega e a'oa'oina ai tama'ita'i tausimai poo le Faculty of Nursing. Na muai auai ma galulue ma le tamā i lo la tofi tiakono i le EFKS Aleisa i Sasa'e, o le Aulotu na Faavaeina e nisi faatasi ma ona matua i le amataga. Ae ona ua taumamao ona ua alala i lo la maota i Tulaele, ona auai mai ai lea ma matou

galulue i le tausaga e 2002. O Aokuso 2012 na maliu ai le tama o le aiga, ae faaauau pea le tautua e le tina ma le fanau. O ia lava o se auauna galue, lelei mo Iesu lona Matai i le malosi ma le mafai e oo i ai. E le tuua ni lelei ae ave ni masei, ao mea sili ma le lelei e oo lava i lona ola e ofo atu lava e fai ai lana auaunaga i le Alii. E le o se tagata malosi i lona soifuaga i le tino, ae ui ina faatutugata, ae tauivi ma taumafai.

E gagana lelei ma soifua tausafia i le va ma tagata, ma tautua le leoa ma le faamaoni mo lona Alii. E fiafia e foai ma agalelei mo isi aemaise i lo ma'ua aiga i le nonofo ai i le galuega. O ia le tasi o tinā pito i matua i le aulotu aemaise o le Mafutaga a Tinā. E ui i le to'agaogao si ona aiga, ae pei lava o tagata i lona soifua fiafia ma faamalosi i le feau a le Alii.

O lona toe sauniga na faia i le malumalu i Tulaele i le aso 24 Setema 2016.

Ta'ita'i - Fa'au'uga Mata'utia (FT). Na fa'aulufale le tinā mo lona sauniga e le Susuga a Sauleone Tanoi FS, O Teo Setefano AF na faitauina le Tusi Paia, o Tuigamala Liu AF na saunia le tatalo, ao Sauleone Tanoi na saunia le Lauga. O Molimau - Pulotu Lynda Chu Ling (Fanau) - June Chu Ling Wright (Uso) - Tomui Ioane - (Sui o le Aiga)

Ona faaiu lea i lau molimau i lona soifua faaleagaga. Na peseina Viiga o le sauniga e le Aufaipese a le EFKS i Tulaele.

Ona faaiu ai lea lona sauniga mulimuli i lona nofoaga mau i Tulaele lava i lona aiga.

Ia viia le Alii i le soifua o lana auauna nei.

Fa'au'uga Matautia (FT)

EFKS Tulaele.

Seiuli Otto Jerome Howard (Hou) Hansell

5 Tesema 1926-27 Iuni 2017

"Ia outou olioli i le Alii e lē aunoa ou te toe fai atu ia outou olioli i le Alii." Filipi 4:4

O Seiuli Hou Hansell, o se Tiakono o le EFKS i Tulaele. Na fanau mai i le aso 5 Tesema 1926 ae maliu i le aso 27 Iuni

faaauuu itulau e 15

O E UA FAI'ILAGI LE FOLAUGA

mai le itulau e 14

**Seiuli Otto Jerome Howard
(Hou) Hansell**

5 Tesema 1926-27 Iuni 2017

2017. Ua atoa ai lona 90 tausaga ma masina e ono le matua o lona soifua. Na faaipopo ia Emily Lina Bryce ma maua ai se fanau e to'a sefulu ma le fa (14), ma ola mai ai le to'atele e sili ma le selau tagata. O se tamā na i ai i le amataga o le lotu nei i le 1980, ma o ia le isi tiakono muamua o le Aulotu.

O ia foi le tasi o le komiti galue o le Aulotu i lona amataga a o tau atia'e le galuega e ui o se tasi e foliga vaivai i lona soifua maloloina, ona na a'afia o ia i le gasegase o le stroke i le vaitau o le 1970, ae na alofagia e le Atua ma faamalolo ia te ia. Ae ui na lē matuā atoatoa lona malosi ae na atoatoa lona lotu faatuatua i le Alii na ia le filemu ai e tauivi i galuega fai o le lotu aemaise i lona tautatina'e i le amataga. Ma te taunuu mai i le 1985 o ia te ia le tofiga o le taina o le logo i Lotu i Aso Sa ma faiga lotu i le afiafi ona e nofo fesagai ma le Falesa. O taimi lava ua fua fuaina mo nei Sauniga Lotu e le mafai ona pa'u, e pa'o le logo i lona taimi. Na ia vaai foi le malumalu mai tamaiti tafafao vale e o mai soli i taimi le tatau. O le 1989 na malaga ai ma le tinā ma aumau i Niu Sila ae na faaauu le matafale e le fanau. Po o le 2012 na toe talii mai ai ma nonofo mau i Samoa nei seia oo ina valaau le Atua i le tinā ia Me 2015. Na tumau pea le la fiafia ma naunau e auai i Sauniga ma fai le tautua masani mo le Alii. O se tamā e tusaafia i ona uiga fiafia, e ui ua le matua atoatoa lana saunoa, ae taumafai mai ma malamalama le mea o ia manatu ai e faalava lana gagana i ona lima, ma a ta'u le alofa o le Atua ona tepa lea i luga ma tusi lona lima i le lagi. E toafilemu lona soifuaga ma fiafia, e le popole i se mea, ona ua matua lona soifua i soo se itu ona ua faamanuaina le fanau faatasi ma lo latou alofa i le tuisiga o lo latou matua.

E fiafia e galue ma foai mo le Alii i Faiga Taulaga aemaise o faiga meaalofa mo le Faifeau ma le Aiga, e le leoa le tautua ae leotele galuega faatino e aliali mai. Ia vaaia le suafa o le Alii i le soifua o lenei tamā o Seiuli H. Hansell.

O lona toe sauniga na faia lava i le malumalu o lana Ekalesia i Tulaele i le aso 28 Iuni 2017. O au na ta'ita'i le sauniga. O Sauleone Tanoi FS na molia i le malumalu mo lona sauniga. O Tuigamala Liu AF na faitauina le Tusi Paia, Sauleone Tanoi FS na tatalo ao Letupu Matautia FS na lauga. Teuteronomie 34:5." O le oti o le auauna a le Alii."

Na peseina lava e le aufaipese a lana Aulotu i Tulaele pese o le Sauniga.

Ona faaii lea i lona sauniga faaii i lona oliolisaga tumau i lona aiga i Tulaele lava na ou ta'ita'iina ma faatofa atu i le tamā i le Pese faamavae a le Au Kerisiano Tofa, Tofa, Ia manuia lau malaga.

Fa'au'uga Mata'utia (FT)

EFKS Tulaele.

Lei Fitu Tuaimalo Vaega 29 Aokuso 1964-3 Iulai 2017

Na soifua mai le afioga i le tiakono ia Lei Fitu Tuaimâlô Vâega i le aso 29 Aokuso 1964, ae valaauina e lona Matai ile aso 3 Iulai o le tausaga nei, 2017. Ua 52 ai ona tausaga, ma masina e 11. O le tausaga 1985 na tuua ai e le tiakono lona aiga i Matautia i Apia ae malaga mai i Niu Sila e saili se lumana'i. Sa fa'aipoipo atu ia Matila Fata Iupati ile aso 21 Me 1994. E to'a 4 le fanau, lua teine, lua tama, o Argentina, Aiga, Raymond ma Jarrel. O le tausaga e 22 Novema 2008, na fa'ae'etiaina ai le tofi tiakono o le auauna ma le faletua e le toeaia o le Pulega Waitemata, Ioritana Laau Tanielu. O Lei, o se tasi o auauna e tele meaalofa a le Atua sa ia te ia a'o soifua. O se auauna sa ola finafinau e fa'aaogâ nei meaalofa. O Lei, o se tagata malosi, e le'i fa'ataotolia fo'i i se gasegase. O se tagata e talenia ile taaloga o le voli polo, faipelç, lakapi ma nisi o taaloga i lenei atunu'u. O le lakapi ua loa ai le auaunaga a le tiakono ile kalapu a le Suburbs ma le 'au siamupini a Aukilani. Sa molimau foi nisi ole aulotu i taimi o ta'aloga a le Pulega ma le Matagaluega a Aukilani. O molimau a nisi o alo ma fanau e fa'apea, o se tamā e faigatā ma sauâ i le latou mafutaga. O Lei Fitu Vaega, o le ulu o le lâ matafale ma le faletua. O ia o se sui o le aufaipese, le

mafutaga a tamā, ma e i le vaega e 3, e pei ona vaevaeina ai le aulotu. O se auauna e tu'u sa'o ana saunoaga ile taimi o fonotaga a le aulotu. E fai mea mae'ae'a, ma fai mea sili mo le Atua. O se tiakono fo'i ua mâtanafana le mafutaga i taimi o fefa'asoaiga. O se auauna e alofa ile galuega a le Atua. O le soifua fai taulaga i so'o se fa'amoemoe auâ le atina'eina o lana ekalesia i Kigiselani fa'apea le ekalesia aoao.

O ona toe Sauniga sa faia lava ile malumalu Kigiselani. O le Sauniga fa'ale-aiga, sa faia ile 4.00 afiafi ole aso Sa, 9 Iulai 2017. O le Susuga ia Safiti Iupati FS sa ta'ita'i ma saunia le upu fa'amafanafana. O le Susuga ia Lemana Pereira AF (Kuiniselani), sa saunia talosaga ma faitauina le Tusi Paia. O lona toe Sauniga, sa faia ile 10.00 taeao o le aso Gafua, 10 Iulai 2017. O a'u sa ta'ita'i ile Sauniga; Safiti Iupati FS na faaulufaleina le sâ o le tiakono; Tofilau Maiava AF na faitauina le Tusi Paia; Lau Lata AF sa tatalo, a'o Maligi Setefano AM, sa saunia le Upu fa'amafanafana. O molimau, na saunia e le faletua o le Tiakono, Mâtila Vâega, ona faaii ai lea i molimau o le soifua galue ma le ola fa'aleagaga o le tiakono, na amata e le Toeaia Penisione ia Maligi Evile, ae ou faaiiina. Sa sosoo ai ma le sauniga i lona oliolisaga tûmau i Waikumete i Glen Eden, ma fa'atôfâ ai i le pese fa'amâvae a le 'au Kerisiano. Talofa uso e, tofaina oe, ua sau le itûpô e mâlôlô!

O Upu a le tusi; "Ua ou tau le taua lelei, ua i'u ia te a'u le tuisinioga, ua ou taofi ile fa'atuatua."

Manuia lau malaga uso!

Fetuliaina Pama FS

EFKS Kingsland, Aukilani, NZ

Anu'ilagi Sa'u Feaii 12 Setema 1932-7 Me 2017

O le tina ia Anu'ilagi, o le sa tautua alii i le Afioga ia Sa'u, o se tapaa o Maota i Savaii. Na maluu o ia i le aso 7 Me i le tausaga nei lava.

O Anu'ilagi o se tina tiakono, ma e ma te taunuu atu i Maota ia Tesema 2016, ua faata'otolia ona o ona 'a'ao ua faaletonu. O se tina ua maua tala, e tautua lotu tele i soo se vaega, aemaise lava i le *faaauau itulau e 16*

O ATA O E UA FAI'ILAGI LE FOLAUGA



**Lei Fitu Tuaimalo
Vaega**



**Te'o Sale'a'aumua
Avaitoga Toelupe**



**Seiuli Otto Jerome
Howard (Hou)
Hansell**

Anu'ilagi Sa'u Fea'i

12 Setema 1932-7 Me 2017

mai le itulau e 15

Mafutaga a Tina.

Sa faia lona toe sauniga i Maota lava, o a'u lava sa ta'ita'i, ae o le Susuga i le Tausi Matagaluega a le Metotisi - Tafua Tai sa lauga, o Fogalele, o le faifeau A.O.G. i Maota sa tatalo, ae o le faifeau A.O.G. i Tafua Tai sa aveina i totonu le sa o le tina tiakono.

Mo le silafia, o le masani lea a lenei nuu o Tafua ma Maota, e auai uma le Au Faigaluega i soo se maliu. E maliu le tina ua 85 tausaga o lona soifua, aua o le aso 12 Setema 1932, na soifua mai ai o ia. E maliu le tina, ua to'a ono le fanau, 8 le fanau fai, ma fanau e to'alua ua uma ona liliu faaletulafonoina.

Manuia lau malaga tina.

Rev. Falevi Petana FS - Maota.



Seiuli Lepetia Tia



Fiapapalagi Kupa



Anu'ilagi Sa'u Fea'i



**Murraye Chu Ling
Faresa**

The Bible

Written in the East, these characters live for ever in the West; written in one province, they pervade the world; penned in rude times, they are prized more and more as civilization advances; product of antiquity, they come home to the business and bosoms of men, women and children in

modern days. Then is it an exaggeration to say that 'the characters of Scripture are a marvel of the mind'?
When I am tired, the Bible is my bed; Or in the dark, the

Bible is my light, When I am hungry, it is living bread, or fearful, it is armour for the fight.